

新學外史圖

卷一 地理

一 地理

清季外交史料卷二百十三

光緒三十四年三月

目錄

農工商部侍郎楊士琦奏遵核暹羅訂約通使事宜摺三月初四日

農工商部侍郎楊士琦奏請設西貢河內爪哇領事片初四日

粵督張人駿致外部抵制日貨事已出示嚴禁電初四日

東督徐世昌致外部天寶山等案與日使相機因應函初九日

東督徐世昌咨外部日佔金州隙地請照約索還自行治理文十三日

奉天省各商埠租地簡章十四日

使法劉式訓致外部辰丸案法京輿論爲日本操持電十八日

津浦鐵路大臣孫寶琦等咨魯撫楊士驤德築山東鐵路如何辦理

希查覆文二十日

科布多辦事大臣錫恆奏佈倫托海擬設委員以資佐理摺二十六日

黑撫程德全奏改訂東省鐵路公司購地伐木合同摺附合同三件二十六日

東督徐世昌致外部李範允等在琿春招兵已嚴禁函二十七日

葡使柏致外部澳門禁運軍火事已轉本國照會附節略二十八日

外部奏與各國議允定期禁止販運莫啡鴉辦法摺二十八日

目錄

清季外交史料卷二百十三

黃巖弢夫王彥威輯

男希隱亮編

孫孝章敬立校

農工商部侍郎楊士琦奏遵核暹羅訂約通使事宜摺

農工商部侍郎楊士琦奏爲遵旨酌核暹羅訂約通使事宜恭摺具陳
仰祈聖鑒事竊臣前准都察院咨稱光緒三十三年八月十九日本院
代奏陳發檀條陳一件奉旨着都察院咨行外務部暨楊士琦酌核辦
理欽此恭錄咨行欽遵等因前來查原呈內稱暹羅一國土地二十餘
萬方里人口數百萬自宣布獨立以來法律政治教育軍備及農工商

着着進步顧其國上有貴族下有奴隸而無與國同休戚之中等人民故識者皆知彼不足以圖強徒爲英法各國所利用彼所謂中等人民者即我國旅居彼國之商民全國商民全國商業皆在吾民之掌握以彼物產之豐富供我人民之懋遷此實中國天然之殖民地近者東西各國皆有駐暹使臣故商業日見進步吾民則既無國家保護之力又無社會公共之心羈旅海外自謀生活與政府絕無關繫種種邪說得乘間入之於國民商業前途所關甚鉅擬請特諭外務部及出使大臣楊士琦考察旅暹商民情形是否能仿各國派駐暹出使大臣或領事以維商務而善鄰交等語臣維暹羅立國南徼互市之利始自隋唐流寓之人多係閩粵梯航通道久被華風係我朝屬國近歲銳意圖強儼

然獨立與各國訂約通商冠蓋四出西人咸目爲東方比利時國不以
弱小而輕之其全國戶口不滿千萬而華僑乃三百萬人人數之衆過
於爪哇商業之盛過於西貢惟我國尙未派有使臣領事爲之保護勢
孤氣餒外人未免相輕臣在暹時商民等環訴籲求殷殷仰望竊以世
界大勢趨重商戰因國際貿易之交通發達而國際之交涉由是而生
故兩國通商卽互有締結條約派遣使臣之權利初不以大小強弱爲
殊况暹羅近居東亞地接滇南屢以緬越界務與英法相交涉尤隱繫
中國邊防固圉保商均關緊要該生所呈各節似屬可行擬請飭下外
務部酌核情形相機辦理以示朝廷惠保商民懷柔遠人之至意所有
遵旨酌核暹羅訂約通使緣由理合恭摺具陳伏乞聖鑒謹奏光緒三

十四年三月初四日奉旨外務部知道

農工商部侍郎楊士琦奏請設西貢河內爪哇領事片

楊士琦片 再東西各國重視商務凡商民之在外國者必設領事以保護之視爲通例所以旅居樂業商務日益擴張南洋各埠華僑數百萬商人商力夙稱雄富喁喁內響久盼撫綏除英屬之新加坡檳榔嶼美屬之小呂宋已設有中國領事外若法屬之越南荷屬之爪哇等埠皆商務最盛僑民最衆之區卒以未設領事受外人欺凌剝削赴訴無門殊爲可憫此次臣在各該埠商民等瀝稟苛待情形環求設領保護情詞懇切查乙酉丙戌條約法人本允我在越南之海防河內等處設立領事嗣以滇桂之事商明緩辦迄今二十餘年法人並不照約優待稅

歛奇重苛例日新視我華人幾同魚肉該埠商會學堂至今未立未始
非積威所壓團體不能遽成默察情形設領一層似難再緩查西貢爲
南圻海口近接閩粵商貨灌輸全越菁華實萃於此擬請設領事一員
駐紮西貢兼轄東埔寨及南圻各省海防爲北圻海口內連滇桂水陸
交通近自滇越鐵路告成邊防尤關緊要擬請設領事一員駐紮海防
兼轄河內及北圻各省如此則形勢聯絡聲息靈通於大局所裨甚鉅
爪哇爲南洋巨島荷蘭恃以立國華人墾闢此土已數百年荷人以我
未設領事任情苛待傭工則視同牛馬商賈則算及鷄豚甚至行動居
住皆有限制不得自由稍一違章即受拘罰其爲馬腰甲必丹者但奉
行荷官命令不肖者且欺凌同類爲虎作倀華人積困之餘亟謀自治

比歲各商會學堂次第設立風氣漸開荷人猜忌益深力圖抵制近廣設學堂俾華人習荷語創行新例以土官轄華人意在箝扼吾民毆歸彼籍其政策至爲陰狠若有領事從旁撓阻或尙可挽回權利維繫人心查南洋一帶荷蘭屬地最多擬請設總領事一員駐紮爪哇此外若蘇門答臘婆羅洲西里伯等埠或酌設副領事或歸總領事兼轄均俟體察情形酌核辦理臣亦知西人性情堅韌慮我設領事撓彼政權提議之時多方推宕然越南爪哇等埠各國早經設有領事豈能顯有異同苟不憚筆舌之繁力與磋磨或能就範駐法使臣劉式訓駐荷使臣陸徵祥均能實心辦事如由外務部知照各該使臣就近與法荷政府認真商辦必能得力臣爲維持商務保護僑民起見理合附片具陳伏

乞聖鑒謹奏光緒三十四年三月初四日奉旨著照所請外務部知道

粵督張人駿致外部抵制日貨事已出示嚴禁電

初二日電祇悉抵制日貨之事前月十五六間因辰丸案及日本東文各報極力辱我政府粵民頗多憤激經駿通飭各屬實力解散並經出示勸諭嚴禁復又傳到商會人等面爲開導現時省會等處已無集衆聚會演說等事惟聞南洋華僑及住居香港日本各華人有提倡不買日貨之說亦經飭令商會和平答覆俾免滋事至粵省商民現議倡興工藝實與抵制日貨無涉官無禁止之理除由駿隨時覺察倘再有聚會演說強人不買日貨之事自當設法禁止以免外人藉口

三月初四日

東督徐世昌致外部天寶山等案與日使相機因應函

頃奉二月二十六日台函並鈔寄日使來往照會具賴大力支持悉心籌畫藉以顧全邊事維持邦交捧誦之餘莫名佩仰天寶山係我國疆域歷經辯析洵無疑義此次韓國援引之白山碑文迺我國領土之確據經大部據理折衝以矛盾盾彼族無可藉辭此後界務問題當較易於得手延吉既在我國主權之下管轄之權自應屬我越墾韓民雜居已久有如歸化固亦與尋常外國人民不同大部照覆日使謂俟十三年會勘成案續商之後自可和平了結洵屬折衷至當近據陳都護吳參領電稱日人於我國之裁判權雖未明認然近來華人與韓人韓人與韓人之訴訟咸送交我地方官審判其赴我國控告者概不干預是固已默示承認矣持之以漸彼族雖狡當亦可就我範圍也至所稱頭

道溝附近華官拘禁韓民以及豆滿江右韓民牛車爲中國官吏拿押各節該地方官吏既有地方之責任自應執行其管轄之權乃其職務所在並無不合且當茲交涉方殷各官吏亦咸知慎重邊務體恤僑氓苟非韓人紊亂秩序擾害治安必不至妄行逮捕之事容俟函詢詳情再行布達一進會之苛待韓民前已縷陳鈞聽近更有統監府派出所屬之韓國巡檢在六道溝一帶勒索韓民已被勒索者三家勒索未遂者六家對於韓民非刑拷掠尤極苛酷以中國領土之內而竟有如此舉動妨害睦誼侵損主權莫此爲甚至日人派駐所建立標木經我地方官悉行拔去此係爲謹守疆土杜絕覬覦起見日人照會動輒以維持現狀爲詞乃彼於現狀之外另立木椿擅改地名是其實際行爲固

亦與所言相戾前奉鈞電已轉達陳吳二君並囑其文牘往還不必太形激烈以免口實必能相機因應仰慰蓋廬續派兵丁一節查延吉舊有吉林分防馬步各營現已遵照陸軍部新章改編爲巡防隊延吉一帶盜氛充斥勦捕重要必須汰弱留強方能得力前次吉林各隊皆係舊編兵數每營減少一半僅二百餘人兵額大減不敷分布不得不酌量調往以符原數是不過抽調換防裁汰老弱募補新兵並非添隊可比其調換前往之隊間或攜帶軍械亦偶有護送糧餉者是以吉省照會日領謂係護糧兵丁來示謂此等事件如能不用照會更爲不著痕跡洵於外情洞若觀火已函致經帥

朱家寶字經田

隨時察酌辦理至延吉民

事警兵前承鈞囑從緩派往現亦僅將本地巡警選換教練酌量改良

以爲彈壓地方之用並未多派來函及鈔摺二分已鈔錄寄交陳吳二君囑其詳加察度一一函覆仍希大部隨時與日使妥爲因應並發據碩畫隨時指示以便遵行邊事幸甚大局幸甚三月初九日

東督徐世昌咨外部日佔金州隙地請照約索還自行

治理文

爲咨呈事據奉天交涉司巡警道呈稱案奉憲台批據漁業公司儘先外委宋懋思稟請照約索還餘地一案奉批稟悉所請索還餘地辦理巡警各節自係爲綏靖地面起見惟據稱去歲曾呈經交涉局批示索地一事已由該局派員往勘現時正在磋商究應如何辦法應否派員前往辦理巡警仰巡警道會同交涉司酌核情形妥議呈覆以憑核奪

等因奉此本司查此案於去年六月間據宋懋思稟稱前情當因此處餘地被日人佔據屢經復州知州以日人在該處分割兩區設立區長徵收錢糧及拔去原立界碑暨佔去鳳鳴各島情事等情稟報前來經前交涉司派員前往查勘查中俄分界之時俄人將金州界地劃出東西長約九十餘里寬一二十里不等作爲隙地立有界碑大者三十一塊小者八塊被日人拔毀僅存大者十二小者四處至劃出隙地內之一百七十五屯日人劃分爲兩區每區設立區長徵收錢糧海面上之鳳鳴西中交流鹿坨平島等五島亦均被日人佔收錢糧等情疊經前交涉局照會日總領事及關東都督府參謀請彼此派員會勘修立界碑嗣准日領覆以奉伊國政府訓令時在嚴冬不便且該處尙有兵隊

駐紮俟撤兵後實行等語迨經該處兵隊撤去後復又先後照會日領
請如約往勘而後終未一覆故當時宋懋思來稟僅札飭復州查明核
辦嗣因該州諭傳宋懋思等外出未能查辦呈覆前來遂即中止現在
若派員逕往該處辦理巡警在我雖照條約辦理在日人未必能答應
將來不特多口舌之爭且恐釀極大交涉本司道等輾轉思維與其貽
悔於後不若審慎於前查光緒二十四年所訂中俄條約第五款內載
明隙地內一切吏治全歸中國官今日人收我隙地錢糧佔我地段已
屬違背約章應先與日人將隙地一案趕爲了結爭回主權將來在該
處設立巡警照約係我應有之權庶權操在我彼則無可藉口而我亦
無患阻撓也應請轉咨外務部將此案趕向日使提議以照約修勘界